



## **“Ilmiy-ommabop gazeta va jurnallarda e’lon qilingan eng yaxshi material” tanlovini tashkil etish va o’tkazish tartibi to’g’risida NIZOM**

### **1-bob. Umumiy qoidalar**

1. Mazkur Nizom “Ilmiy-ommabop gazeta va jurnallarda e’lon qilingan eng yaxshi material” tanlovini (keyingi o’rinlarda – Tanlov) tashkil etish va o’tkazish tartibini belgilaydi.

2. Tanlov ilmiy-ommabop gazeta va jurnallarda e’lon qilinayotgan va yuqori professional darajada tayyorlangan eng yaxshi materiallarni aniqlash hamda ularning mualliflarini taqdirlash maqsadida tashkil etiladi.

3. Tanlov har yili may-iyun oylarida o’tkaziladi.

4. Mazkur Nizomda quyidagi asosiy tushunchalar qo’llaniladi:

**ishtirokchi** – tanlovda qatnashish uchun ariza bergan oliy ta’lim muassasalarida faoliyat olib borayotgan 35 yoshgacha bo’lgan yosh olimlar, ilmiy izlanuvchilari va talabalar;

**material** – ilmiy-ommabop gazeta va jurnallarda e’lon qilingan maqola, sharh va boshqa mahsulotlar (hammualliflikda e’lon qilingan materiallar bundan mustasno);

**tashkilotchi** – Oliy ta’lim, fan va innovatsiyalar vazirligi;

**Tashkiliy ishchi guruh** – tanlovni tashkil etish va o’tkazish, unda tanlov uchun taqdim etilgan materiallarni baholash mezonlarini va hakamlar hay’ati tarkibini tasdiqlash, g’oliblar hamda rag’batlantiruvchi o’rinlarni aniqlash, shuningdek tanlovni o’tkazish bilan bog’liq boshqa tashkiliy masalalarni hal qilish vazifalarini amalga oshiruvchi kollegial organ;

**Hakamlar hay’ati** – tanlov ishtirokchilarining arizalari bilan taqdim etilgan materiallarni baholovchi ekspertlar guruhi.

5. Tanlov ilmiy-ommabop gazeta va jurnallarda chop etilgan materiallar yo’nalishida o’tkaziladi.

6. Tashkiliy ishchi guruhning yig’ilishi zaruratga qarab, lekin bir yilda kamida bir marta o’tkaziladi.

7. Hakamlar hay’ati tashkilotchilar, shuningdek, vazirlik huzuridagi Jamoatchilik kengashi a’zolari, oliy ta’lim tashkilotlari, nodavlat notijorat tashkilotlar, hamda ommaviy axborot vositalarining tajribali vakillaridan iborat tarkibda Tashkiliy ishchi guruh tomonidan tuziladi.

### **2-bob. Tanlovni tashkil etish va o’tkazish tartibi**

8. “Ilmiy-ommabop gazeta va jurnallarda e’lon qilingan eng yaxshi material” tanlovi ushbu Nizom ilovasida keltirilgan sxemaga muvofiq tashkil etiladi.

9. Tashkilotchilar har yili yanvar oyidan boshlab tanlovni o'tkazish haqidagi e'lonlarni o'z rasmiy veb-sayti va ijtimoiy tarmog'dagi sahifalarida joylashtirib boradi.

10. Ishtirokchi har yili may oyining 1–10-sanalarida (10 kun muddatda) ilmiy-ommabop gazeta va jurnallarda e'lon qilingan 1 ta materialni elektron yoki bevosita Tashkiliy ishchi guruhga tanlovda ishtirok etish uchun ariza bilan birga taqdim etadi.

Arizaga quyidagilar ilova qilinadi:

tanlovga taqdim etilayotgan material va ularning qachon va qaysi ilmiy-ommabop gazeta va jurnallarda e'lon qilinganligi haqidagi ma'lumot;

ilmiy-ommabop gazeta va jurnallarda chop etilgan materialning elektron (pdf) shakli.

11. Tashkiliy ishchi guruh tanlovga kelib tushgan materiallarni umumlashtiradi va baholash uchun Hakamlar hay'atiga taqdim etadi.

12. Mualliflik huquqi va turdosh huquqlar hamda boshqa intellektual mulk huquqlarining buzilishi, ushbu Nizomda belgilangan tartiblarga rioya qilmaslik bilan bog'liq qoidabuzarliklar aniqlangan taqdirda, Tashkiliy ishchi guruh ishtirokchilarni tanlovda qatnashish imkoniyatidan mahrum qilish huquqiga ega, bu holat tegishli bayonnoma bilan rasmiylashtiriladi.

13. Hakamlar hay'ati:

taqdim etilgan materiallarni har yili may oyining 11–30-sanasiga qadar (20 kun muddatda) Tashkiliy ishchi guruh tomonidan belgilanadigan talablar (mezonlar) asosida baholaydi;

har yili iyun oyining 5-sanasiga qadar baholash yakunlari bo'yicha g'olib deb topilgan mualliflarni aniqlaydi.

14. Tashkilotchilar har yili iyun oyining 20-sanasiga qadar tanlov g'oliblarini taqdirlaydi hamda ularning nomlarini o'z rasmiy veb-sayti va ijtimoiy tarmoqdagi sahifalarida e'lon qiladi.

15. Tanlovda ilmiy-ommabop materiallardan tashqari boshqa materiallar ishtirok etishi mumkin emas.

16. Topshirilgan materiallar so'nggi bir o'quv yili mobaynida birinchi marotaba e'lon qilingan bo'lishi zarur.

### **3-bob. Tashkilotchilar, Tashkiliy ishchi guruh va hakamlar hay'atining asosiy vazifalari**

17. Tashkilotchilar:

tanlovni tashkil etadi va o'tkazadi;

Tashkiliy ishchi guruh faoliyatiga ko'maklashadi;

tanlov e'loni, jarayonlari va yakunlari haqidagi axborotlarni o'z rasmiy veb-sayti va Internet jahon axborot tarmog'idagi sahifalarida e'lon qilib boradi;

tanlov g'oliblarini rag'batlantiradi;

hakamlar hay'ati a'zolari homiylar mablag'lari hisobidan rag'batlantiriladi.

18. Tashkiliy ishchi guruh:

hakamlar hay'ati tarkibini shakllantiradi va tasdiqlaydi, zaruratga ko'ra, hakamlar hay'ati tarkibiga o'zgartirishlar kiritadi;

noxolis yondashuv, manfaatlar to'qnashuvi, korrupsiyaga oid huquqbuzarlik, shaxsiy manfaatdorlik holatlariga yo'l qo'ymaslik choralari ko'radi;

tanlov bo'yicha kelib tushgan murojaatlarni belgilangan tartibda ko'rib chiqadi;

g'oliblarni saralashda hakamlar hay'ati tomonidan adolatlilik, shaffoflik mezonlariga rioya qilinishini ta'minlaydi;

tanlovga kelib tushgan materiallarni baholash mezonlarini ishlab chiqadi va tasdiqlaydi;

tanlov ishtirokchilarining hakamlar hay'ati qarorlari ustidan shikoyatlarini ko'rib chiqadi.

19. Hakamlar hay'ati:

materiallarni adolatlilik, shaffoflik mezonlariga rioya qilgan holda professional talablar asosida ko'rib chiqadi va baholaydi;

g'oliblarni aniqlaydi hamda tegishli bayonnoma bilan rasmiylashtiradi;

noxolis yondashuv, manfaatlar to'qnashuvi, korrupsiyaga oid huquqbuzarlik, shaxsiy manfaatdorlik holatlariga yo'l qo'ymaslik, natijalar e'lon qilingunga qadar uning sir saqlanishini ta'minlash choralari ko'radi.

#### **4-bob. Tanlov g'oliblarini mukofotlash tartibi**

20. Tanlov g'oliblari 1, 2 va 3-o'rinlar (bir nafardan) baholash mezonlari asosida aniqlash orqali belgilanadi.

21. G'oliblar Oliy ta'lim, fan va innovatsiyalar vazirligining Oliy ta'lim muassasalarini rivojlantirish jamg'armasi mablag'lari hisobidan quyidagi (daromad solig'i bilan qo'shib hisoblangan) miqdorda pul mukofotlari va diplom bilan taqdirlanadi:

1-o'ringa – bazaviy hisoblash miqdorining 25 baravari miqdorida;

2-o'ringa – bazaviy hisoblash miqdorining 20 baravari miqdorida;

3-o'ringa – bazaviy hisoblash miqdorining 15 baravari miqdorida.

22. Tanlovga tayyorgarlik ko'rish va o'tkazish bilan bog'liq sarf-xarajatlar Oliy ta'lim, fan va innovatsiyalar vazirligining Oliy ta'lim muassasalarini rivojlantirish jamg'armasi, homiylik mablag'lari va qonunchilik hujjatlari bilan taqiqlanmagan boshqa manbalar hisobidan moliyalashtiriladi.

#### **5-bob. Yakunlovchi qoidalar**

23. Tanlovga taqdim etilgan materiallar to'g'risidagi ma'lumotlarning haqqoniyligiga ishtirokchi javobgar hisoblanadi.

24. Mazkur Nizom talablarining buzilishida aybdor bo'lgan shaxslar qonunchilikka muvofiq belgilangan tartibda javobgar bo'ladi.